

Kluí-Kluí

Kemtuik nebut so nguok go

Max Yaboysembut,	Mamda
Simson Mlapbanu,	Meykali
Regina Bauu,	Meykali
Derek Waling,	Aíp
Yehuda Yaboysembut,	Saplung-Samon
Charles Nasa,	Suayap-kangok go
Isak Yaboysembut,	Seguolíp
Yakup Imonsana,	Seguolíp
Maurits Kleku,	Dumadi
Fince Wasanggay,	Seguolíp
Martina B. Awoítaw,	Aímbea
Daniel Dua,	Aímbea
Yusak Yaboysembut,	Seguolíp
Naomi Samon,	Seguolíp
Septinus Yaboysembut,	Seguolíp
Yustus Magon,	Seguolíp
Yuliana Yaboysembut,	Seguolíp
Marice Yalu,	Seguolíp
Yohanis Magon,	Seguolíp
Hortenci Waynambe,	Suayap-seguay go
Marinus Bayani,	Seguolíp
Dominggus Waynambe,	Aímbea
Yance Yaboysembut,	Seguolíp
Markus Basu,	Aímbea

Loka Karya Muatan Lokal

Kemtuik Nebut Senong Genang sogo

Seguolip
Kemtuik
Papua

15 - 19 Maret 2004



Kabung yow so lemoy go.

Ku meno no sedue naklay klat so gemang klong,
klat yat-nenawon go, nebo gemang but.
Nebo ngganemot lek go, weng go Saliyap no tui go,
nggano gemang duik-newon. Sedue lo nebo
ngganemot gluik go, yamso gemang dam-nenawon.
Nemot so dedam go nogo, seguo ngge kalik so
gemang pong-netenawon: e.....sedue lo dedam
go.....kabung kua dedam go, ku no-ku no
ngganemot kalik so sesemu.

Ku meno no senunnang gemang tup go, jeh.....sedue
klat yat-neton go nebo but go, nemotnang lo banom
dedam-neton? Esang! Imot kua senong.

Nggano kabung naklay nebut pen-nenawon go, ngge
kalik so gemang-pu newon: "Nggasui go imot kim
mentam iti go, yow go tabang kalik so mea sebut.

Yam so sebut gono, nemotnang yatrang gemang
kok-newon. Imotnang yow kalik mea lemoy go pling.
Sedue tandali klat sik so pung gono, senunnang mit
no gemang weng. Sedue ikum gono, nemotnang
naklay-naklay yow go tabang kok go, yow so lemoy
go, blo dega sono gemang pling lak.

No, esang meno duo nu ey go nogo, nemot blo so
nogo ya kua pling, ku dato no kim dop no gemang
glung. Nggano sedue lo, ple lo but-nenawon go,
tegut ey ku no, gemang kenong.

Yow nogo mam nebut, ngge no yam.

*Sui-sui:Naomi
Yuliana*

Nebut tap pung

Banu Maret, ku 15 sik so, e.....ku 20 no, Seguolip yakena no, Kemtuik nebut keballi ta taling genang sogo mo semu. Ku ngganemot no, mamnebut ngge, genam lo Kemtuik nebut klui-klui sik so mo yaluim. Ngganemot nggeasui go tandali sam ngge ba no, nemotnang go nebuem nemu bu lap ey, genam lo suey so mo semu.

Genam lo duing go, ngge suey, nemotnang ikum go, keballi suey so dabui yakay ey mea semu. Ngganemot no yam sogo, sam ngge ikum go nogo, ngga no motnang go keballi nogo, genam logo suey motnang nogo gabe pu dali.


Mia Jelly van der Wilden



Menggi nogo mambut

Banim go sedue meno gemang. Sedue ngganemot Menggi, nemot go saysuk ta tuk masi tuk semu go mata so, ngganemot ba lo welu gemang kok lak. Nemot lo wet go, seduekabung ey go ya kua tegu. Sedue kabung ey tegu go, nemot lo sedue kabung ngganemot ple lo mea mlak. Ngganemot sogo so, nemot go sui temuit go: Menggi Mambay Kualom bunguok kalik so.

*Sui-sui: Markus Basu
Daniel Dua
Septinus Yaboysembut
Marinus Bayani*



Nuik: Aka usu semu go.

Aka sedue ey aka kabung ey usu trok go. Yam so trok gono, aka sedue usu di gemang tuo-won. Usu di yam so tuo gono, woy pli go, usu koy gemang puit. Usu koy puit go, aka kabung usu so kekuali, nggano aka sedue usu tema so keklik.

Aka ey aka ey usu yam so kuali go, ngga no tema yam so klik dali go, nggeasui go usu seni iti go dam genang sogo ku mea bung.
Usu nogo nebut ngge no yam.

Nuik: usu kebalí sesemu go.

Seni so, atnang sedue Kemtuik usu trok sogo, mianang lo banim usu mea trok. Nggano ayanang di tuo sogo, banim no di san sok go, ngga ey di kangok-kangok go mea tuo. Yam so tuo go, woy pli go, koy mea puit. Ngganemot no mianang, yense, udui, naning, isa, temu mata so gemang dali. Ngga yam so kuali go, ayanang usu tema mea klik. Tema ba no usu seni suey so mea iti go dam. Kemtuik go usu nogo nebut nggeno yam.

*Sui-sui: Yahuda Yaboysembut
Maures Kleku
Simson Mlapbanu
Max Yaboysembut
Regina Bano*

Sedue ey maso ey go

Sedue ey maso ey ibui suing so gemang kebewon.
Ngganomot no sedue lo maso no gemang pu-ton:
Andua: "Mot lo ya klak bilo?" Nggano maso lo
gemang pu-ton: "Andua genam ya kua klak, mot lo
se klak-bilo". Ngga ey maso ku no itak go, sedue lo
gemang klak- biwon.

Ngganemot no sedue lo wi nok bebut go, ku no
kenong go, maso lo iti go keda so kiki so dam-ton.
Use, ku yam sogono, sedue li go, ikum go, wi nok
maso lo yam so mo dam.

Ngganemot sogo so sedue lo usi go wi nok kay,
maso lo pu go, wi nok at lo yam so mo dam-tu.
Ngganemot no nemotnamon sagui gemang pung-
klenawon.

Yam

*Sui-sui: Yakop Imonsana
Isak Yaboysembut
Derek Waling
Dominggus Waynambe*



Waling ey, waling ey go nebut.

Waling ey-waling ey nemot namon duot so duen bano gemang klong. Waling dem, yap yam so klik-wongo, nggano nemotnamon duot gemang tuo-kletun.

Waling Dem duot sok go, ngga no Waling Debui lo kanok gemang suik-tegun. Ku meno no Waling Dem ple iti go, duen balo gemang klong, nggano nemot nebo gemang tegu-won. Nggano Waling Dem nebo truiik go gemang but-won, ngga ey nebo ngga nemot kua dok go, duen ba sikso go pung go, gemang betep-won.

Waling Debui kanok yam so suik go, muk ey glung go gemang-bantun. Use ku klik gono nembo gemang duik-ketun.

Waling ey, waling ey, go nebut ngge no yam.

Sui: Charles Nasa

